

摘藻堂四庫全書薈要

集部

欽定四庫全書薈要

集部

石田詩選卷二



詳校官候補通政司經歷臣郭祚熾

欽定四庫全書薈要

石田詩選目錄

卷一

天文

時令

卷二

山川  
園池田家附

卷三

居室

亭館附

寺觀

祠廟

墳墓附

卷四

宗族

雜流

僧道

卷五

古迹

懷古

時事

述懷

卷六

忠孝

節義附

閒適

慶壽

生辰附

會晤

卷七

投贈

寄答附

題號

謝答

送別

傷悼

送葬附

卷八

圖像

圖畫

墨蹟

文辭

卷九

花竹  
草木附

鳥獸  
魚蟲附

器用

卷十

詠物

雜詠

臣等謹案石田詩選十卷明沈周撰周字啓南號石田長洲人景泰中郡守以賢良舉辭不赴事迹具明史隱逸傳此集不標體制不譜年月但分天文時令等三十一類蓋仿宋人分類杜詩之例據慈谿張鈇跋蓋其友光



祿寺署丞華汝德所編也周以畫名一代詩  
非其所甚留意然棲心林壑名利兩忘風月  
往還烟雲供養其胸次本無塵累故所作亦  
不瑣不琢自然拔俗集舊有吳寬序稱其詩  
餘發為圖繪妙逼古人核實而論周固畫之  
餘溢而為詩非詩之餘溢而為畫寬序其詩  
故主詩而賓畫耳又有李東陽後序東陽與  
周不相識時已為大學士與周勢分懸隔以

吳寬嘗以寫本示之重其為人故越三十年  
後又補為作之然二序皆為全集而作華汝  
德刊此選本時仍而錄之今並從刪削云乾  
隆四十二年十二月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書薈要卷一萬六千八百七

集部

石田詩選卷一

明 沈周 撰

天文

弘治改元元旦遇雨

元旦未及春東風意先蘇風來繼零雨和潤物皆濡助  
我新天子沛澤彌九區河流亦傳清天與聖德符賢俊  
日拔庸治道務精圖堯舜不異人政化無兩途我衰在

畎畝感激舞蹈俱告戒各努力勤耕備公租黍穰多充  
禽淵靜無驚魚上下信影響餘生幸于于

雪作二首

經春十日忽作雪如此紛然門且關瞥見豪華成白屋  
錯加粉飾累青山侵凌廣野容無地零亂高空落自間  
兀坐搔頭何遣搔梅花寒勒未開顏

春雪公然沮春雨莫能為潤祇漫漫撒鹽差似殊無味  
執玉徒觀不辟寒滿地蕭條悲鳥雀何人徙倚愛闌干

凍皴手足鬚俱折擁被微吟強自寬

二月三十日雨中

此雨送殘月陰雲隱有雷草雖宜濕長花亦要晴開溝  
漫魚爭上泥深馬忌來春山只隔眼應待我銜杯

三月一日喜晴小步用士弘韻

雨春情況悶中諳一日初晴月已三半濕半開花解笑  
相呼相喚鳥交談閒行聊樂將誰伴獨咏而歸也自堪  
更有餘懷成漫酌好風吹面小軒南

嘲雨

雨澤之所至千里為其方其落萬萬注河沙數微茫方  
中高低田多少落不當高者少莫潤低者多乃殃雖有  
利物名功過不相償落之徒勞勞所怨亦穰穰何如一  
輪月分影不可量一處有一月一月散千光只譬一州  
城萬人住中央一人一觴酒一月照一觴一觴吸一月  
人醉月無傷月自行中天不驚亦不忙房杜昔為相垂  
紳坐廟堂天下屬默化熙哉稱有唐安石似道輩瑣才

事更張聚斂以為政戕民隳宋綱君子與小人於焉觀  
否臧我方坐雨厄斐然成此章

風雨中戲三郎園櫻盡落

風風雨雨未開晴憂病憂田白髮生聞道西園尤作惡  
小僮歡喜拾殘櫻

雨悶

久雨連陰結青天安在哉大由雲所子浩及水為災群  
葉無情盡么花借濕開寂然泥淖地苦憶舊人來

雨夜自遣

需霽寥寥坐夜長呼童轉燭更添香  
澄懷有物嫌詩在  
聾耳無聞併雨忘  
頭上青天終自出人間  
白屋暫相當  
明朝補漏吾還得手把黃茅作向陽

五月十五夜見月映樹有作

圓月出樹東  
隔着被樹墨羣葉相蒙  
茂光采還透射玉盤  
雖隱映其魄自整暇  
脫樹漸自高萬里大明  
夸了了  
太極圈誰向虛空畫  
坐深已當頭其樹勢  
斯下小人蔽



君子暫爾何足訝  
樹月亦偶當微吟  
聊壁言借

中秋湖中翫月

愛是中秋月滿湖  
儘貪佳賞亦須臾  
固知萬古有此月  
但恐百年無老夫  
鴻鴈長波空眼眦  
魚龍清影亂眉鬚  
人間樂地因人得  
莫少詩篇及酒壺

錢士弘以東坡船邀汎月病阻因答

東坡新船高似屋  
兩舷開窓三十六  
昨乘缺月汎昆湖  
今汎揚湖月方足  
老夫不及困河魚  
到月足時人欠福

莫能扶僂踏高筵馬不進兮人累俗翠盤露酒白玉香  
一飲之緣惜難卜月從水上憶車公還能入戶尋幽獨  
枕前只作卧遊人亦有清華爛雙目高吟不寐待回船  
輸却醉鄉詩可贖

暑中寫雪圖

六月添衣喚童子自畫雪圖茅屋裡玉花出筆飛上樹  
慘澹陰山無乃是老生放筆還自笑顛倒炎涼聊戲爾  
門前有客來借看滿眼黃塵汗如雨

松庭對雪

三白觸眼喜欲顛  
天王繼統新改年  
宜天厭惡下土濁  
以此雪之同皎然  
光照明堂納祥瑞  
一平天下知其權  
疾而蒙藏能過厚  
卑而令高如進賢  
先時上帑寶珠玉  
今恣四野開瓊田  
何須聚斂自委積  
過而不拾貪夫悛  
先時豺虎橫食人  
空山忍饑今可憐  
威能扶天已闕茸  
勢可炙手還螭蝮  
老夫忍凍亦慣事  
草廬安抱牛衣眠  
庭前孤松有喜色  
要與老夫相作緣

冬日

冬日晴可愛溫如君子人即之不覺熱默生懷抱春執  
卷南榮下吾目亦滋神何嫌炙背徒負以獻吾君

臘月二十八日立春得雨

小閣櫺窓風自推手添香炷撥爐灰殘年送病詩中去  
淑氣將春雨裏回午案待嘗新茁韭陽檐思訪欲開梅  
歲功代謝忙如許似與衰翁遮老來

憫日雜言

日既去日復來來如赴去如頽來是誰約去是誰推一  
來一去彼此自禪續無與我與何故使我心驚猜似乎  
少年有根是汝拔老醜無種是汝栽百年所算三萬六  
千日自我而數指作枚我今行年已七十歷日二萬五  
千枚所該百而去七大大半又復使我心驚歎雖欲不  
驚歎猛見霜絲雪縷垂兩腮何況人生不滿百疾烏捷  
兔又如此而相催我思天地靈長之氣十二萬九千六  
百年然後運窮劫盡蕩而為灰吾人亦謂參三才胡乃

其氣短索不得相追陪準天地而言人眇塵海之一埃  
慨歲月之玩人同古今而一雷我無長繩繫日住亦無  
長戈揮日回亦不知學仙能久視亦不知託佛能輪迴  
而今而後去之日付一盃來之日付一盃不憂罄其餅  
恥其壘春暖秋涼山邊水隈訪黃菊尋白梅秋月自與  
吾慮淨春雲自與吾懷開晝遊之地吾蓬萊夕息之處  
吾夜臺以殤視我吾老大以彭視我吾嬰孩信壽夭吾  
何以外請享此見在不樂胡為哉

苦雨寄城中諸友二首

一陣接一陣一朝連一朝  
官仍追舊賦天又沒新苗  
白日不相照浮雲那得消  
君休問餓飽且看沈郎腰  
新雨似舊雨今年即去年  
只愁沈垆土或喜亭青天  
頓頓黃薤雍雍家家白鷺田  
惟應五穀地改納水衡錢

秋雨偶書

雲暗湖村水漫沙  
秋堂蕭颯類僧家  
聰明比舊堂堂減  
老嬾隨年數數加  
風扇未愁蕉破葉  
雨房偏恐稻傷花

坐深兀兀多資睡強欲開書候日華

中秋賞月與浦汝正諸君同賦

少時不辨中秋月視與常時無各別老來偏與月相戀  
戀月還應戀佳節老人能得幾中秋信是流光不可留  
古今換人不換月舊月新人風馬牛壺中有酒且為樂  
盃巡到手莫推却月圓還似故人圓故人散去如月落  
眼中漸覺少故人乘月夜遊誰我嗔高歌太白問月句  
自詫白髮欺青春青春白髮固不及豪捲酒波連月吸



老夫老及六十年更問中秋賒四十

星墮

惟己酉十月五日立冬始鷄後涉黎明寤者稍稍起有  
星流西北而從東南止其大如車輪蓬然曳長尾撒星  
更拋燭遺落相縈縈其光白中黃燭地以晝比行旅盡  
驚仆吠犬鳴驚雉墮地如砲聲引響久未已牀闥皆簸  
撼約聞三百里七月嘗示異不意復有此瞥過視莫諦  
墮處曷究擬至地當有化其形當何似其墮當何曜其

金史紀事本末卷一  
罰當何理竊謂經與緯墮一天缺紀無乃金火餘其氣  
互合耳餘衍固非正謫罰自有旨苗祥付茫茫不敢叩  
太史

對春雨

春雨父母情惠物侔愛子潤被發華妍長養助欣喜庭  
垂存腐蕉土渥芽伊始齋心臨散絲清虛及窓几自愴  
槁颯姿均榮固無理

中秋無月歌

老年於世百無與待盡光陰而已耳佳時令節或難忘  
有酒還隨大家喜一時過去少一時打算百年能得幾  
滿前童叟倏突弁少者如斯老何恃去年中秋月在城  
白壁團團酒波裏今年中秋月在家買酒邀賓走兒子  
雲漫天黑月失色老子之興殊敗矣老子非月能萬古  
暫借一光何足鄙中秋失月不中秋人固無聊月當恥  
常時有月我無酒有酒呼月今不起有無無有兩難謀  
要是天公忌全美世途茫茫寓萬事顛之倒之亦如此

眼中屠販却封侯意外詩書多餓死便從一月觀萬變  
何敢容心必其理感深坐久欲添衣風急秋高夜如水

溧陽道中遇雨

浮雲接地日無光足力衰遲道路長都是小兒能疾走  
這場風雨却誰當

有竹莊賞月

爛擁銀盤草屋東白頭相賞兩三翁青天不老人自老  
明月正中秋亦中怪底有娥因藥誤謀諸無婦恐尊空

百年各願身強健此夜年年此燕同

八月十七夜待月

候月月不出引醪兼話長柳黃延返照苧白應新涼惜  
壁沉海氣待珠開夜光我壘猶未恥願早賁林堂

時令

元日

今日之日一年始三百六十年之終雲物昭回天杲杲  
風光澹蕩氣融融商量柳色綠少許爛熳梅花白大同

無事此杯椒栢酒老夫不覺笑顏紅

四日過有竹莊

春早拏舟聞鵲鳴病餘勉強竹莊行開年數日匆匆易  
向老逢人往往生陰隲瘦姿松抱冷雪洲芳意草知晴  
稍通酒觥聊乘興亦漫詩篇度野情

人日喜晴

今辰謂人生風日佳可喜七居陽之正宜云造物始占  
晴協陽吉其兆比君子霧雨忌為陰小人象斯擬君子

履于祥歲事無不舉小人道用晦顧有菑害倚東臯動  
春風強健供耒耜持以告吾人毋憂往時否

七日樹介

千松凜凜清霜戰萬竹森森白玉爰無數小兒相怪問  
老夫搔首但邾婁

元夕席上贈冷菴憲副二首

石湖樂事漫吳臺茅屋今宵也一回上客門前探節到  
小兒城裏買燈來生香竹葉迎春熟活色蓮花映火開

粧點太平須要此百年常覆掌中盃

堂帶春星月滿臺勸君且飲一千回休言美酒消愁得  
亦被華燈送老來急管繁絃聲乍合千門萬戶夜齊開  
明年佳節依然在分付春光駐此盃

春晴出遊

天宇及軒霽品物各華妍清般約同儕酪醕仍擊鮮展  
酌臨芳樹鳴琴參笑言促羽酬良辰迅光不長延請看  
劉伶墳酌之莫達泉



閒居四時吟

白日可形指青春茂迹尋不應有開花還復有鳴禽何  
物衰颯翁樂意亦充襟浩然不能過登臨動謠吟謠吟  
侑杯酌花鳥同山林一暢太和氣載鼓康衢音捫心自  
有會求知非在今

赫暑薰永日衆皆苦煩酷林廬賴溪次茅茨非厦屋門  
前蔭重柳簷後鬱鬱深竹無風氣蕭爽汗瀋免決肉尚可  
加白葛喜謝裸裎俗晝靜茶瓜餘攤書教孫讀既倦還

偃息夢寐亦清淑

秋涼我所愛人情與時宜因念康節言還眷康樂嬉杖  
屨足濟勝出門隨所之舉睇達遐邇邇山水陳高卑洞庭  
吹白波落木不可持我持覽明鏡因之悲素絲素絲不  
復玄物變咸有時亟欲學神仙早憫氣血衰羨彼南山  
色青青無老期

若若風木號靡靡霜草白敝褐氣不溫坐擁簷間日大  
兜輪租還升斗告既畢區區氓庶勤萬一答帝力簷陽

歷飛帙倏忽燈火夕光下目尚見展茲編年冊其迹類  
歲功乘除無紀極非徒遣永漏亦足知往昔

上巳即興

春暘麗廣野和風汎冠裳庶物爭敷暢蕊蕊媚時光綠  
溪盪清流俯見鬢眉蒼假祓聊復耳所適茲晨良握蘭  
襲清芬偶羽接飛觴沂水不可即道遠徒徬徨

春歸曲

今朝三月三十日問春果是明朝歸春歸當向何處去

春亦不言花亂飛東家蝴蝶已無賴強逐遊絲揚落暉  
春樓粉暗女子嫁朱門烏啼賓客稀春一去萬事非臨  
歧更把一杯酒愁見墻頭梅子肥

端午漫書

丁酉

周也渾衰憊奔波已不便親淹碯上殯食仰水中田借  
貸煩親戚饑寒罪歲年低頭搔白鬢雪涕在青編憂患  
今如此聰明不及前私情吾自訟公急衆誰憐凋瘵應  
傷骨劬勞不息肩趨文棄田稚隨例劾庸錢違奪虛吾

日號呼徹上天誅求家百世政令月三遷簡靜高明度  
更張小諒權烏安求茂木魚樂奔深淵流剝如為釁搔  
驚孰任愆申商疑實際卓魯似徒傳青艾誰攻病紅荼  
他自妍深居思俊德分贊仗諸賢莫以威嚴恃須知憂  
樂懸厭兒求角黍與俗話蒲鞭積雨殊滂矣浮雲亦黯  
然致嬰門限外此意向誰宣

端午小酌

親朋滿座笑開眉雲澹風輕節物宜淺酌未忘非好酒

老懷聊樂為乘時堂瓶爛熳葵枝倚奴髻髻朋鬢艾葉垂  
見享太平身七十餘年能補幾篇詩

六月望夕作

十年六月十五望昏時月出當巽向初從地中已遭蝕  
妖墓大吞魄俱喪輾空漸高已半露黑氣輪光兩相盪  
其色昏昏赤如血熒惑紅芒近仍抗老夫茫茫不識占  
但稱恠事驚還悵未聞官府行護典太史豈遺還弗諒  
不食而食天自愆人未容知未容讓不如買酒洗此月

一洗千年永無恙

立秋夜望

霜毛隨葉落搔首忽心驚  
節物其如我乾坤聊且生  
誰家無月色何樹不秋聲  
好在清哦地憂然庭鶴鳴

秋暑夜坐

星河垂地夜闌珊  
坐久幽懷百事關  
畏老欲逃如鏡裏  
苦塵難脫限人間  
一亭多竹還妨月  
二水宜家又欠山  
世好茫茫誰是足  
祇除心迹自高閒

秋夜

白屋衡門擁墮樵秋懷落落夜寥寥人間篋笥悲紈扇  
天上樓臺欸玉簫竹實未生岐鳳老蕉書不展塞鴻遙  
青春雖在潘郎髻只恐愁多亦易凋

九日無菊

今日九月九無菊且飲酒明年九月九有菊亦飲酒有  
花還問酒有無有酒不論花無有好花難開好時節好  
酒難逢好親友一盃兩盃長在手六印何消金握斗三



盃五盃不離口萬事莫談瓶且守瓶云罄矣我即休載  
欲謀之已無婦天應私我身獨在天不全人花乃後遲  
之明日興還存紫蓋青苞得開否倘看爛熳即重陽借  
酒東墻惱隣叟

九日值雨無菊

重陽薄酒且沾脣歲患雖煩節物新昨日未知今日雨  
流年不怨老年人籬花欠事無黃菊江草多愁漫白蘋  
何待齊山始酬醉小孫須辦拾頭巾

和吳匏菴續滿城風雨近重陽之作

滿城風雨近重陽寂寥寥破草堂彭澤花枝待晴把  
雲安麴米帶生嘗梳頭髮應吾年白潤屋金從別姓黃  
慚與潘郎續遺句沈郎瘦不似潘郎

丁巳除夜

數日匆匆歲告終溫存惟有此宵同安知媚術先求竈  
未信空文必送窮詩卷可留還自壽釣竿無恙任為翁  
茅堂已與年俱舊簾幙沈沈不動風

與韓克瞻蘇安道守歲

杪歲樂合并留戀甫及除不可負竒遇請勿歌歸歎天  
地一逆旅所在皆吾廬各念年歲改忽忽不我儲相守  
戒毋寐徹夜亦湏臾四序流且既其程惟僅餘丑鷄苦  
無情宵曙聲啞如隔隣促沽酒一一圍地壚傳盃相彼  
此巡次不可虛林靜風滅響音雨迹良漸踈俯仰百年內  
幾人今夕俱人情與節物攬筆吾當書

守歲

歲行殊碌碌來往類爪期越日成新舊關情有什離畫  
儺俱散後白叟不眠時孤注一年計同人此夜私五窮  
無術遣百拙信天為舉酒鷄鳴際聊申繼綵辭

送歲詞

白粉作白糰今夜送歲用千年萬年例千家萬家共歲  
去還自來送者徒鄭重初謂人送歲終反被歲送人於  
一歲間過眼幾悲痛送盡人不知處歲若處夢我有同  
室人今年室已空

秋日早興

高齋梧栝涼意好但是雨聲妨晏眠一心默默百感內  
萬事悠悠孤枕邊鷄鳴犬吠物有為晝短夜長天上偏  
起來盥櫛了無作賴此牀頭秋水篇

立春日試筆

雪屋蕭然折竹間畏風門戶鎮須關鄉推老大悲年逝  
人誚迂踈喜事閑土銜撥灰燒凍芋雲簷補屨織新菅  
深居終日無聊賴或為兒嬉一解顏

除夜

五十三迴送歲除世情初熟鬢應疎事能容忍終無悔  
心絕安排便自如立券每賒扶病藥作緘因借養生書  
親羹坐雪肥鮮少索畫人來喜饋魚

病餘待旦

衾鐵凌衰颯無眠展轉頻鷄餘千慮枕霜下五更人夢  
緒不可續窗光渾未真兩童牀脚底覓睡怕教晨

除夜留客

客會合時湏有酒歲乘除際可無詩乾坤假我為逆旅  
日月玩人猶小兒黃屢相尋奈新厯白都不剩笑殘髭  
浮生踪跡任流止見面儘強空爾思

留客守歲歌

請君勿思家相將守除歲誰家守歲同故人惟我與君  
開此例作詩送歲君有篇買酒酒餽歲我有錢莫嫌苦與  
歲留連惜是明朝已隔年本戀歲華還戀客亦惜明年  
又南北歲來歲去自無窮客去客來頭漸白白頭無春

風且暎燈花紅燈花落處天拂曙君起云歸歲亦去歸  
家馬蹄急如飛家人關門諱不歸

元日四首

物華初煥發鄙抱亦生春開歲始今日杖鄉無幾人蟻  
醅浮甕冽鷄彩暎門新笑進三分盞聊娛八十親

賀旦亦隨俗筋衰拜莫便鬢毛關燕次厯紀曠生年地  
氣通亥早晴光入戶妍小孫看滿抱不待衆人憐

野俗誇占候年芳比昨強值人春立早加閏歲行長話



緒及農切盃巡次客忙援時從少飲獨後感流光  
頻頻逢獻歲健日憶兒童有母敢稱老無年不願豐堂  
光靜宜北風氣暖知東萬擾來吾慮悠悠致靜中

元日用長字韻

年來隱計自為長簪笏何如書滿堂入眼睛雲占歲氣  
照門春日動江光傳椒老子騰騰醉騎竹兒童故故狂  
車馬東華雖富貴貧窮吾亦愛吾鄉

初春

番暖番寒似小兒嫩  
春天氣作嬌癡  
預先辦酒等花發  
醉到花飛亦霎時

微黃冉冉柳生姿  
數日春晴陡有私  
新水一陂他自暖  
跳魚何故却先知

燈夕

燈火長街闕小兒  
龍鍾老子亦隨嬉  
小兒作闕渾無度  
老子貪嬉固有時  
滿眼杯盤人盡醉  
大家簫鼓夜何其  
金吾不禁銷金事  
莫為春城筭酒資

秋夜獨坐

萬事縈思獨坐中  
爐香深處性靈空  
藥如效世黃金賤  
年莫瞞人白髮公  
踈竹晝窗因借月  
墮樵驚屋偶乘風  
且來拂簟尋高卧  
夢境浮生一笑同

秋宵

秋宵殊為老人長  
展轉衾裯夜氣涼  
夢到衰年隨血少  
事尋閒感累心忙  
憑凌殘月空梁鼠  
干聒西風破壁螢  
強把清吟訴無賴  
亦堪延緩及窗光

二十五夜戀歲

與歲別在邇五日即告終三百六十日漫過已匆匆餘  
此知莫留頃忽迅飄風譬若盃酒闌客散堂欲空強爾  
拉老兵徘徊之歡悰把筆構短篇燈前擁衰翁衰翁迫  
歲事微吟搔鬢蓬

七月十五日城中晚歸

晚郭歸舟急若何市塵猶恐累漁蓑到家覺得曾風雨  
兩樹芭蕉破葉多

十月二十八日早自城回

短日促解纜起程霜鬢蓬岸姿微雨潤人影淡波通一  
鳥沒虛碧數楓留晚紅指家渾不遠村過更橋東

八月一日病中即事

旬時惟有藥追陪斷不思拈舊酒盃慮靜爐香宜夜坐  
眼酸書卷怯朝開江蘋白應松鱸出庭草紅催朔鴈來  
老去苦驚時節換壯心那復傲寒灰

石田詩選卷一

欽定四庫全書蒼苔要卷一萬六千八百八集部

石田詩選卷二

明 沈周 撰

山川 園池田家附

舟中望虞山與吳匏菴同賦三首

虞山我隣境欲往路非遙  
比來無好抱風日虛春朝  
茲藉嘉友興理舟訪岩堯  
漸喜蒼翠近豁眼嵐霏消  
上有古松杉落落旌幢標  
其下見行人往來雜僧樵  
我坐意

亦馳宣伺雙屐超何異謝康樂巫湖眺且遨

登梁昭明讀書臺訪徐辰翁丹井

遠秀目已週復騁登高足青山不嫌人所取隨我欲巍  
巍古仙壇寂寂奠林麓七檜交雲霞靈飈散清馥崇臺  
轉磴道攀緣把傍竹同行玉堂彥高詠應虛谷逍遙東  
山風已屏歌管俗申紙驚連章謬圖仍附軸聊以志傾  
賞流傳亦何卜或恐聞邦人有酒悔無逐

留連山中薄暮返棹



遲遲二三客，默默對層岑。  
轉柁清川口，忽然西日沉。  
常時急歸路，茲焉迂我心。  
行行望不輟，去遠思滋深。  
所思何以寫，丹青亦難任。  
不如就明月，彈我丘中琴。

過長蕩

發迹過長蕩，識此平生始。  
春流方漫衍，曠蕩彌十里。  
老葑蔽層雲，敷芽青蕤蕤。  
正如一明鏡，剝蝕銅鏽起。  
西山欲臨照，掩却螺髻美。  
山亦拗怒去，南走太湖涘。  
羣勢湧疊浪，爭捷互排擠。  
我恐先我去，揮手唱止止。  
湖山四面

好轉側皆可喜此面正佳絕扁舟載西子芳洲有隙地  
肯賣脫紫綺移家非丹砂所好在山水

溪上獨坐

觀生吾自得飽飯荷農功盤石箕雙足清流影一翁松  
喬藤輔德楓老葉還童好在尋詩地無人杖屨同

漁村

吳江本澤國漁戶小成村楓葉紅秋屋蘆花白夜門都  
無三姓住漫可十家存熟酒呼兒女分魚喧弟昆不憂

風雨橫惟憚水衡煩  
鷗趁撐舟尾蟹行穿屋根  
怡然樂生聚業外復何言

經尚湖望虞山

日午放船湖上頭  
虞山隨船走不休  
高雲仰見出翠壁  
飛影下接滄波流  
青林人家隱山麓  
鷄鳴犬吠聞中洲  
鷓鴣羣棲竹葉暗  
蜻蜒特立荷花秋  
蓮歌漁唱尚互答  
落景在樹猶堪遊  
小舟爭渡各先去  
獨逆風波渾不憂

宿白馬澗

濕雲載春山晴秀悵莫逢朝來雙闥前頓失千龍從天  
地大藏疾何所不包容峯巒皆養晦草木未發蒙芙蓉  
不敢巧反撲鴻濛中老青叵辨物存亡詰兒童晝夜不  
分明中恐移愚公又慮九疑縮萬里來相通爭高或不  
平出氣盪其胃水墨用吾事丹青莫為工

大石狀

望望秦餘抗首尾行不了大石突其尻翹然一拳擣山  
體厚藏骨吐秀此特表正類抱中嬰頭頂露於襟形大

氣則散趣足在於小其深雖未即遠觀已自好頃來莫  
能窮繼至敢草草循墻道林麓記曲乃遺杳登登覺向  
峻漸漸駕木杪猊峯據門左呵禁口欲齧有磴沿百級  
有殿嵌山造並殿跨偃石懸身龍媯矯行人自其下恍  
惚怖四爪轉高踏其背股慄身亦掉鎮腦結佛亭所仗  
力可擾四壁滿題句貴賤成雜掃同遊懲涉險旋踵促  
及早次尋巖間窾蜂房互窈窕緣勢盡西向局地窄接  
繚雲棧中貫穿所歷平地少山靜日自長石瘠人亦槁

坐僻覲居安傳竒被遊攪陽厓詫脣掀陰竇疑目宵虛  
含風颺颺濕暎雲稍稍衆絢不可熨亂豐龜拆兆層疊  
百寶合正紺或厠縹亘此金剛座千古不可剽危椒壓  
屋脊雷雨常怯倒草木亦作恠牢絡萬藤蕙蒼松長深  
根本矮枝節老斜見山桃花微紅暎叢篠草異傳多藥  
采掇未諳曉欲宿償三過衾裯悔忘抱既夕氣更佳延  
月象倍皎尚欠一踏雪意先有瑤島情狀要細述言語  
未獲巧不期諸蟲鬼挂腹早韞藁宛然紫芙蓉為我一

手拗東坡昔袖去援例我非狡山僧苦着相便覺生煩  
惱

移席茅山東頂徐永年避酒而去作歌嘲之

自我來茅山春霧撥不開冥迷五日思困頓當面不見  
紫翠堆今朝喜有風迅掃兩目浩蕩天光回秀峯戢戢  
各拱立伺我道左千戟排蒼松為幄碧草薦窪石一一  
羅尊壘高天廣野寄笑傲芙蓉對面勸我一吸三百盃  
徐卿不能有此量自椒而竄山之隈隔林大呼谷與應

掉首竟去無徘徊却從地上舉手謝遠意若訴不得相  
追陪會難別易畧不恤有樂弗取真吳歎山禽衝客喙  
餘尚野花點席粘殘醅老兵既失老僧在且握石子為  
闌猜醉來枕藉足力憊扶掖不起相推頽明朝爛熳別  
辦治遊事青山在在似作遊人媒久住山亦許不作謝  
令推憑我裁截筆作剪信我包括詩為胎請君急急還  
來看恠事金鼈左股昨夜安在哉

雪中登虎丘



月色風光知幾到好奇今補雪中緣急排岩樹開高閣  
生怕溪山又少年城郭萬家羣王府塔簷千溜半空泉  
香茶美酒殊酬酢似此登臨亦可傳

雨中看山寄楊君謙

看雨春山中晴日未可及巒華與嶺秀濯濯翠流汁水  
墨間卷畫屏風四圍立襟花逗餘紅雅與松共濕低雲  
滿窗戶似愛幽者入我初作靜觀併喜得靜習紛紛冶  
遊子此境不足給有詩在此境佳句待人拾詩腸倘乾

燥亦許借潤浥持之報揚子正可事屐笠

水村圖

魚庄蟹舍一叢叢湖上成村似畫中互渚斷沙橋自貫  
輕鷗遠水地俱空船迷楊柳人依綠燈隔蒹葭火映紅  
全與吾家風致合草堂曾有此愚翁

天平山

天平合在名山志山下祠堂更有名何地定藏司馬史  
此曾誰負范公兵高屏落日雲霞亂襍樹交花鳥雀爭

要上龍門發長嘯世人無耳着鸞聲

光福

羣山西奔駐湖尾通川夾山三十里川窮小滌開鏡光  
居民次水屋比比屋上有山屋下水開門波光眼如洗  
虎山橋畔晚市忙打鼓漁郎賣鮮鯉霜前摘柚萬苞黃  
雨後楊梅千樹紫山園水抱開農桑樂土風光真畫裏  
三年潢潦我無家恨不移書亦居此

和張碧溪登寶峯韻二首

樂事春來要不空直登峯頂路方窮青山始爾三人酒  
白髮泠然萬里風城郭週遭江勢轉鶯花爛熳物華同  
太平無象今成象好在詩篇杖屨中

新醅拍拍玉光浮挈榼提壺判醉遊高帽特尋芳樹掛  
清歌緩共晚雲流頻來信我何拘忌大勝為官待告休  
日日乘春知未足翠微還補菊花秋

三宿虎丘松巢

夕陽繫纜有餘輝入寺登登曲徑微孤塔白雲平鳥背

疎林黃葉映僧衣  
臨池吊劍寒泉在  
捫石尋題古刻稀  
便欲留詩補三過

三次有圖于此

眼花燈影不成揮

與沈工侍時暘登大潮山絕頂

侍郎不到十年餘  
拉我松行喜並輿  
客子初疑穿虎豹  
僧伽高住自鐘魚  
龍蛇起陸香山近  
鵬鷄摩天震澤虛  
把酒直從峯絕處  
眼空錯認是匡廬

汎舟橫大江

汎舟橫大江流止  
隨西東前頭望廣水  
後頭望連峯客

程渺茫茫行雲無旋蹤霜露霑我衣覽鏡饒減容

約客山行先後相失

春山同遊不同席却被青山笑相隔村蹊宛轉馬不進  
來者固遲歸亦急問人云去苦不遠如酌稍延當有及  
空亭鳥下小燕過祇見殘花與殘核手捫路竹漫刊詩  
將記後來君可識白雲酢汝一盃酒不問老兵何得失

山行

雲壑風泉處處宜詩囊酒榼大家嬉人來人往春無主

日短日長天有時墮蔽林亭看螿競插花山轎愛蜂隨  
野僧未識登臨樂靜自關門笑客癡

楚江秋曉卷三首

天連湘漢水悠悠水色微茫接素秋殘月已沈三國恨  
亂雲初散九疑愁南方流落身將老西候蕭條客倦遊  
欲采蘋花恨無伴美人迢遞隔滄洲

葭莢蒼蒼白露時蕭條江色帶微暉平沙鴈逐寒潮起  
野樹鴉隨亂葉飛漸見九溪如練淨尚憐三戶似星稀

金史四庫全書  
卷二  
不堪昨夜南遊客愁向西風憶授衣

夢回江上算秋程水影迢迢積漸明落木西風連鄂渚  
亂山高浪隱湓城鐘邊野寺經僧起霜裡孤帆估客行  
往事獨悲前席誤不從賈誼問蒼生

自甲浦道太湖四十里見異香諸山喜而有作

清茗達宜興道湖已成算僕夫却告難風浪卒莫翫勸  
我陟山麓正爾免憂患彼此有得失我臆殊未斷譬山  
行見湖昏昏祇浩瀚何如行湖中坐見山秀爛僕尚請



決筮得需利在豕毅然促飛櫓猛進不復悞深穴有虎  
子履險獲竒觀出浦即會勝列嶂擁一岸遙思攬吳香  
妄意覓仙幔羣聳西若監巨浸東罔畔天謂湖太淫設  
此似按攤雲濤日衝撞石趾力抵扞輸贏各無能兩壘  
對楚漢我行鋒鏑間便以老命拌山疑相慰藉逐逐笑  
供玩始有舟楫虞盡被山破散山亦有情狀要我綺語  
讚氣聚勢則附形散脉復貫遠近相衍迤中自存博換  
雖靜有動機萬態紛變亂虬龍徐蜿蜒獅狔悍奔竄夷

突各不一小大畧相半正展芙蓉屏橫亘蒼玉案晴穀  
縑日光莫熨錦繡段金庭與玉柱遠弄波影粲厯眼四  
十程續續青不斷平生詫傳聞信美非謾調修辭聊梗  
槩歸憶庶可按

岳麓秋清為西涯李閣老題

蕩摩雲漢覺喬然形勢雄看岳勢連赤帝奠靈天立極  
紫陽宏道地生賢人凌灝氣攀珠斗峯落清湘見玉蓮  
上相舊遊今不忘寫懷還復事圖傳

天柱晴雲 全前

一柱巍巍萬象超，切台接斗見宮堯。命惟說用今為礪，  
天許姚擎玉作標。森列宸楓均湛露，夤緣野竹上青霄。  
文章變化成何似，更倚雲霞看寫描。

黃山遊卷為篁塹程宮詹題

黃山巍峩四萬尺，摩天曩日高莫敵。天下之人皆識名，  
土著之人遊未極。篁塹先生二十年，亦自今茲方決策。  
沈沈冬雨作泥淖，日日需晴蠟雙屐。天將試人故作沮。

拂面猶嫌雪飄白先生一意牢不破十客追隨三不逸到  
山浮雲為開路石立偉夫厓左逆梁飛危甃虹不收樹  
翳古湫龍所宅湯泉熾沸幽广下熱酒不須敲火石境  
深漸覺與世遠下界便從風雨隔諸峯六六互出沒目  
抉雲蹤寄高厯容成浮丘合居此呼之不出聞笙笛祥  
符小憇僅四詩天待先生儘蒼壁不應止此便返駕謂  
啟一行多後役作圖何事到野人耳聽安能當目擊長  
安在西但西笑是邪非邪聊水墨更是高篇不容苟

能掛一還漏百宛陵妙語括嵩勝亦與歐公曠遊席歐  
公不有宛陵無紙尾但留三歎息

暮春登虎丘

獨信微吟人不知山花滿地悔來遲久搯綠樹陰中杖  
仰辨丹崖缺處詩日有閒緣遊始勝老無健步出非宜  
一迴到此一迴少怕近清泉見髻絲

汎菴畫溪

長溪碧衍玉光淨樹夾兩堦俱倒映羣峯樹杪髻螺出

一一隨行似相勝小舟貼水天上坐了見鬚眉落秋鏡  
溪當比我懷尚澄池固不凡遊亦勝舫歌偶爾及滄浪  
野鳥忽飛魚忽泳中流手洗白磁觥一勺分清空百病  
喜聞秋潦轉澄瑩健在能尋不妨更

遊張公洞

并引

弘治己未之三月余來宜興客吳君大本所二十一  
日大本倡曰張洞果老修真處古福地之列吾邦之  
仙域也必啟君一遊余笑曰業已訂之矣於是理舟

載酒從汎溪而南歷菴畫溪迤邐四十餘里始舍舟  
陸行望西南諸山高下層疊叢然莫知所謂洞處詰  
之樵人指盂山曰此中是已其山於羣山最下而小  
計其高不過二十仞心甚易之豈靈區異壤能結乎  
是哉冉冉曲經田塍間三里許乃抵已暮亟由林麓  
左行折而北二百步路次臨一穴甚深晦其脣有雜  
樹蔽虧人謂此洞之天窗也轉及山椒則洞口在焉  
呀然向西北且隘有石衡亘于上如門楹然入必俯

首上摩小方有刻未暇讀門側置片石楸紋縱橫云  
為仙枰疑好事者設之自茲從石級下度載上載下  
崎嶇甚疲於老足因小憇旁石瞰下冥冥時嵐氣滃  
淖如水涵于中不可儼步隱隱惟見石臺耳暝色漸  
翳迨無所覩乃下山議宿道士張碧溪林館規以明  
日補其未足之遊夜二鼓雨作簷聲浪浪悵然謂必  
敗乃事矣黎明天就霽即蹶起厭浥行濕莽中喜劇  
興熱却校猛進冉冉馬足若虛躡洳洳馬身若淵墜



愈下而境愈奇乃及臺而昨俯見天窗者今則仰視  
之日光下映四顧瞭然下多亂石傾亞有崩跌勢洞  
傳孫氏赤烏間霹靂所開天窗可想其迹也臺踞洞  
北趾崇丈餘南面而立則三面環見皆石壁壁拔地  
漸高而偃如鵬翼蹇空燾下其中豁豁壁之理上下  
皆庚庚而橫理中乳流萬株色如染靛巨者么者長  
者縮者銳者截然而平者茁茁者螺旋者參差不侔  
一一皆倒懸儼乎怒猊掀吻廉牙利齒欲噍而未合

殊令人悚悚乳末餘膏溜地積為石槽數長軀離立  
兀兀色揉青綠可愛西壁下作大裂斜而衍幽而窅  
內多流石錯互初隨行小僮誤由洞口歧而入忽見  
蹒跚出于罅處衆訝曰何小子之佻達也東壁下一  
小洞廁門內有石窪滴水滿中又一洞正南壁中極  
黝黑云過半里許余闖之寒氣淦淦襲人不可久佇  
大本則挾童奴二三輩執炬踉蹌而入覺其挺詣之  
無難也非但不能抑不敢以老身試其不測惟盤桓

臺下恣得俯仰之觀嗟乎設者不自知其巧而使遊者知之知也有不能盡其知遊也亦有不易者焉余於宜興二過洞尚相昧今於一識迨老始獲之可信境於人間不多設遊於人生不能幾遭因引酒獨酌心與境融樂與迹超洋洋乎欲參造物者遊謂可遺世而長存不知果翁之得果何如哉時大本自別洞出仍來候余厯言其中石林石竈丹田之異旁之列洞不可殫記余曰毋多詫我我亦有神僭子往矣大

本請記而系以詩詩曰

仙山不在高靈區設中冓包蒙自太古霹靂始與牖閭  
然不耀地白日已通晝遂褻世遊人我及千載後登頓  
入地中足與石角鬪飛厓臨紫雲既掀勢還覆仰面欲  
成壓山鬼自司救元氣不蒸雨五色變乳溜支本萬不  
齊纂纂纂簪筍瘦又如人披腹呈此琅玕秀旁扉表雲房  
曲密通欵竇跬步必容炬老膽怯且逗神仙未易求冥  
探亦何構矯手采瑤華和飲千日酎聊度三千年擬與

石同壽

溪上

春日照熙百鳥鳴東溪試步覺芒輕閒來閒往曾無為  
時笑時歌自有情止水觸風微起縠過雲生雨畧攙晴  
隣翁偶揖還相訊道是先生底獨行

登金山

龍宮湧出玉嶙峋乍眼來看極悚神滿地莫論無坐處  
東坡忽至佛印室中曰中流真見不羈人  
東坡蘇山詩云金山亦是

不羈人 墻低樹少多容月石瘦花慳晏得春舟揖一江名  
利路烟波誰謂不生塵

史明古曾約同遊今已化去

鬚翁久憶金焦勝感慨來登獨老身生死隔塵空舊約  
江山如此欠斯人強留詩酒聊三日愁送鶯花又一春  
浩蕩烟波莽回首漫將行樂與誰論

和西涯李閣老韻留題金山

儘有風波怯往還又因名勝使人攀天將白玉浮諸水

誰以黃金姓此山欲就一竿漁浩蕩更憑雙足弄潺湲  
老僧莫作誰何問只借中泠洗醉顏

妙高臺望江

一源萬里勢成三截地分明限北南長塹悠悠天所設  
奔流浩浩海相涵獨憐擊楫存遺誓可笑投鞭足漫談  
頭白妙高方縱目落霞孤鷺晚猶貪

飲中泠泉

此山有此泉他山無此泉泉名與山名並為天下傳山

泉兩合德珠璧輝江天宛在水中央天使塵土懸山本  
一江石泉井從石穿非鬼不可鑿人莫知其源黥深貫  
龍窟不溢亦不濤我久負渴心始修一吸緣憑闌引小  
勺冰雪流荒咽載灌肝與肺化作清泠淵沁沁若沆瀣  
逐逐空腥膻至味謝茗薜亦不從烹煎謬哉康王谷欲  
勝宜未然未伺鴻漸知但飲必推先由我口舌譬亦獲  
參其玄世多未沾者茫茫尚垂涎滿注兩大壺載歸下  
江船搖光蕩江月汎影雲亦鮮分潤及鄉人七碗同通



仙

歸途欲登惠山時烟雨空濛衆有難色余獨奮往  
惠山恠我昨徑去歸來欲登却作雨濕雲隔眼失高翠  
掉頭不顧真巢父願治笠屐往慰謝衆慮需濡吾莫沮  
我言惠不在天上行不畏難當至耳呼童挈榼客乃從  
一段竒蹤自伊始西湖山色竒空濛當與此山移此語  
過鵝湖與碧溪同載尋光祿汝德

登舟自東川行行渺西驚返照變湖色四浸映浮樹輕

風汎廣水低昂浪相互亦復踈雨零頃耳遂澄霽延盃  
引叢語殊莫省脩路遙睇君子居聊賦停雲句欲擷汀  
洲芳悵然無所遇

和吳匏菴姚氏園池四絕

宮庶才名天下知舊題留在此園池墨痕蠹盡重翻稿  
二十年來似夢時

蚤起治園晚始歸黃昏蝙蝠滿堂飛人家夜例開門睡  
甚矣先生併去扉

雨後春池漫石磯  
櫻桃梅子兩爭肥  
東風試暖諸生暇  
閒就滄浪浣舊衣

小小園池儘自清  
不曾誇大命  
新名看花看竹多  
佳客竹與追陪花送迎

和匏菴觀治園和韻

散直樂清燕  
緩帶行園中  
闢荒自伊始  
有力適我脩羣  
磔一何多  
瑣屑錯蒿蓬  
漸理塍與溝  
瓜瓜見泉踪  
作者苟不劃  
奚憂植難豐  
况喜臨皇畿  
春早氣自蔥  
好鳥鳴

樹顛東方至和風勿去觀小道治國將無同

水悶

破屋如舟只浮住茫茫魚鼈是比隣頻年大塊無乾土  
何處巢居著老身萬頃禾田春澇富數聲雷腹曉飡貧  
詩書不飽還堪遣開卷時時感昔人

圖錢氏沁雪石

亭前峙奇石兀可當一障沁此萬古雪亘地氣魄壯蒸  
雲勢欲軒得月神更王妙擬軼仇池潤未下雪浪剗鑿

天借巧曾次見洞蕩孤立宜有隣雅許脩竹傍風雨不  
敢泐刻名久無恙寶此一夔足磔硤不多尚貞德允配  
主白衣可呼丈我見便欲拜良信米弗誑聊與貌高古  
敢有愚公妄

謝顧天祥送將樂石

一拳竒骨勝仇池落眼真看玉雪姿急掃秋軒容突兀  
更栽野竹與扶持已藏東海從深袖便捲滄波答小詩  
莫道空言尚加拜此懷還託米顛知

雨後經西園

小園西百步五畝未為慳得雨草皆滿無風花自閒儘  
清全賴水論足尚虧山樹藝有餘養其如丁者頑

登牛頭峯和陳永之韻

秋至無所適牛峯期峻攀攜手相魚貫極力凌孱顏東  
來望城郭北指鬱江關涼風振木末葉飄巾屢間俯見  
行旅人役役往復還如我二三子逍遙意自閒其中有  
達德高誼薄雲山

夜登千人石 有序

四月九日因往西山薄暮不及行艤舟虎丘東趾月  
漸明遂登千人座徘徊緩步山空人靜此景異常迺  
紀是作

一山有此座勝處無勝此羣類盡曉出夷曠特如砥其  
脚挿靈湫敷霞面深紫我謂瑪瑙坡但是名差美城中  
士與女數到不知幾列酒卽為席歌舞日諠市今我作  
夜遊千載當隗始澄懷示清逸瓶罌真足恥亦莫費泉

燭步月良可喜月皎光潑地措足畏踏水所廣無百步  
旋遶千步起一步照一影千影千人比一我欲該千其  
意亦妄矣譬佛現千界出自一毫耳又愛林木杪玲瓏  
殿閣倚僧窻或暎綠總在蛛網裏聞聞萬響滅獨度足  
然履恐有竊觀人明朝以僊擬

因揚君謙見和復和一首

狹逕穿山腹盤盤雄厯此吳王三千劔意以是為砥鐵  
髓積廣面歲久色尚紫石槩竒窵窵此以平為美坐閱



今古人當不知千幾集坐畢一時傳傳嫌如市况乃實  
不及千名何以始準波釋氏誕萬億未為恥俗驚少攝  
多走觀信而喜我登紀夜吟其面月如水揚子時莫偕  
清篇觸倡起厯厯到以意不遊與遊比語語盡括石石  
舉在詩矣使石尚化玉倏忽鬼入耳玩之靈光生曼之  
雅音倚氣復在春雲詩又在石裏瑟縮愧我辭荆棘礙  
步履自笑邯鄲人胡為強追擬

君謙又和復答

子才五色石補天曾以此餘才散為詩或突或如砥今  
賦千人坐秀句尚紅紫誰謂丈人醜貴有幼婦美一篇  
似難又連篇不覺幾謂即事深刻打搨滿城市先時漫  
無文增重信伊始我如呼風鳩悲鳴自堪恥子如希有  
鳥九萬借風喜上掣層霄雲下掠滄溟水餘力播此石  
久靜當崛起點頭有公案悟詩與禪比不然只冥頑一  
石而已矣我言子無答一言而已耳尚容答千人琅玕  
雜然倚還招舊時月總照新象裏我復就盤陀箕踞脫

雙履咏言証千人使石無妄擬

載和答諸友

我閱丘中石巖巖特見此天不生廉隅蕩矣若加砥但  
嫌色相在雨洗常出紫坦坦宜坐人喻千溢其美未如  
清涼達所容不拘幾可拔豈萬牛菱谿笑穿市夫差墓  
其側恃固乃經始小類莫試劒脆裂傍可恥夜夜麗明  
月玩弄少客喜我來發豪吟鶴磻應流水初憑石乘興  
亦半因月起百年擇一勝頗與赤壁比有石無此月其

遊亦漫矣有月更有石有詩兼稱耳下里和者多聲韻  
妙依倚曾中各磊砢爭出言句裏何當拉諸君我亦補  
芒履明年待中秋石遊更堪擬

月夕汲虎丘第三泉煮茶坐松下清啜

夜扣僧房覓澗腴山童道我吝村沽未傳盧氏煎茶法  
先執蘇公調水符石鼎沸風憐碧縷甌盛月看金鋪  
細吟滿啜長松下若使無詩味亦枯

和馮抑之大小千山歌韻

大干山小干山宛如兩玉浮湖間却疑子產不受棄於  
水古人高誼今者行何難山亦有何欲誰與名之干有  
干於世則有欲礪愧林慚當厚顏君不見寢丘之後有  
妬谷避惡之人居亦棄又不見廣州之間有貪泉好廉  
之人飲所忌我為別立名寄示雙嶙峋大名大玉小小  
玉洗爾慚愧開精神老夫十年枵腹水沒稻朝惟嚙日  
莫殄霞與雲平生餓死事極小俛眉承睫何為人

莫釐登高卷

已亥秋文明府天爵訪王翰林濟之同登莫釐之峯  
二公各有記予不能同遊不知其為勝茲強作圖與  
詩聊復爾耳

洞庭兩山浮具區金庭玉柱僊所都翰林王君列僊儒  
住隔萬頃玻璃湖洪濤巨浪相吞屠我欲從之老命虞  
海東文侯眼孔大視之不與坳堂殊眼中之人不可呼  
翩然往就喬之鳧文侯文侯實尹吳所治百里山水俱  
山靈河伯受約束疑為後擁仍前驅高登莫釐盡竒觀

云古未始今當無白波青嶂坐可挹紅粧細馬來敢汗  
兩人傲睨萬象表但恐笑語天人狙揮毫撫景間盃酌  
作文競與山描摹湖山洵美我未識翻意斯文相厚誣  
緣文作畫強鄙夫正如槌埴求其途茫茫意會復有詠  
長安西笑何其迂有生不遊山亦誦手搔白髮吁嗟乎

寄題金山

金山名天下名大山則小我在童丱時其名已自曉願  
登蓋有待待待首空皓屢叩土著人掛漏簾可道所亘

百畝石江心泊浮島山中無空處皆以殿閣遠及參能  
賦者語莫盡其巧我托耳為登聊且厭悵懊譬如山墮  
夢其境皆夢造夢覺費追隨所得未了了有路縣不遠  
有身無大擾從地借健步從天借不老便須遊一年寫  
此平生抱

病中懷西山

兀兀安衰疾重簾竹下房日因忙者短夜為老人長薦  
粥修蔬品抄書類藥方西山行樂地螯酒付誰狂



拂水崖

只有省山是勝緣  
青鞋布襪且輕便  
天收雨脚賒今日  
我趁花時遣老年  
絕壁雲扶將墮石  
豁崖風勒下奔泉  
此來不憤空歸去  
旋構新篇揀竹鐫

過湖村

幾家成聚落  
鷄犬夕陽時  
人影臨流揖  
帆梢拂樹移  
積禾高屋脊  
落葉厚茆茨  
隣並尤淳厚  
常通無有私

城中夜歸

塵累茫茫有鬱襟思鄉就晚發城陰潮來頻長溝渠量  
船過平穿市井心僕子促程雙奮櫓人家臨水亂鳴砧  
柴門高想慈親倚新月疏星恐夜深

崔氏水南小隱

一家縣水嬾通橋寂寂寥寥遠市朝寸地有生耕子姓  
索居無類畫漁樵晚波垂柳供魚貫春雨高梧養鳳條  
莫謂溫生同住此不因車馬趁人招

江山勝覽

滿地桑蓬屬少年出門自賦遠遊篇匡廬真面開屏玉  
嵩華僊踪倚嶽蓮野市誰家濯春酒隣船何處訪秋絃  
老子牖下今頭白司馬山川是夢緣

三月九日舟泊虞山下見遊人續續于椒麓間可

愛而賦

霽色澄虞山正與遊人偶一年無多月春三及秋九勿  
厭傾郭人隨俗悅親友春風若招邀處處開花柳林華競  
妍新無復有惡醜間見叢綠中遠映紅裙婦休云惱山

谷點綴亦可取，樞趨識壯步。屢頓驗皓首，下上相追攜。  
從高引衣手，尚有散逸流。列石自俎豆，老夫目中盡未。  
在。逐逐走况，當氣力衰，孤坐還可酒。

雲山

雲是青山舊鉛粉，一翻粧點一翻新。鬢邊白髮偏無賴，  
點著都成老醜人。

丹陽道中

抖擻山邊水際身，廿年重踏舊京塵。依依殘夢丹陽月，

兀兀輕車白髮人  
諒自去來無箇事  
趁他花柳未分春  
關津莫作誰何問  
詩酒承平一老民

錢士弘阻遊虞山

我懸虞山當一舍  
曾幾尋山止其下  
見山便恠老足困  
劍門拂水心空掛  
諸君生長為山鄰  
終日熟遊非曰乍  
今朝懊惱有長篇  
頗被春泥妨不借  
儘自空濛雨亦奇  
抱衾况宿林廬夜  
開門點火照芙蓉  
濕翠還堪酒中瀉

湖上雜言

金少日人  
卷二  
縱目極遐曠水嬉湖中央青山載白波上下相低昂俯  
首愛雲霞零亂隨蘭槳悠悠溯空冥忽忽超景光宛宛  
漢臯女落鴈懸微茫可望不可即相思如水長

題沈履德遊湖雜詠卷

朝看湖船出暮看湖船還遊人趁日不用揀雨晴雪月  
何曾閒舉頭看山低頭飲唱詩小女桃華顏青山亦來  
照湖水一鏡映入千螺鬟便可斗酒詩百篇更選絕壁  
鏡其頑青山萬古湖萬古歲月但與遊人慳昨日遊湖

人今日埋青山青山與湖同玩世儘把少年勾引老者  
刪君不見白樂天蘇子瞻二公不能再為湖山起虛名  
空掛湖山間我當把湖釀酒日日醉豈被紅塵白髮相  
欺謾

再至虎丘松巢主僧索畫用空谷山居韻

世諦紛紛擾擾間松巢來詰老僧閒愛山已結峯頭屋  
借畫仍看屋裏山池影心空和月見巖扉客去倩雲關  
新茶新笋都叨却香積誰云染指還

夜行村路中用程篁墩虎丘韻

躑躅經墟復歷丘  
晝時不走夜時遊  
泥途我有多岐歎  
江海誰閒野渡舟  
著力自家須杖屨  
發明何許借膏油  
從知世路不易涉  
只好歸眠舊草樓

紫雲洞

天地不秘寶芙蓉  
擘空青借問此何居  
仙人敞雲扃翩然  
招玉童導我探宵  
冥高歌振逸響側  
足履落星下有古  
靈湫天光泛清泠  
酌之可不死閱世  
齊冥靈







石田詩選卷二



總校官進士臣胡 榮

校對官中書臣王家賓

謄錄舉人臣武先振